

হইল বলিয়া শ্রীভগবদগীতায় উক্ত “ন বুদ্ধিভেদং জনয়েদজ্ঞানাং কৰ্ম-
সঙ্গিনাং”—এই শ্লোকের সঙ্গে বিরোধ উপস্থিত হয়। কারণ যতদিন পর্য্যন্ত
ভক্তি অনুষ্ঠানে দৃঢ় শ্রদ্ধার উদয় না হইবে, ততদিন পর্য্যন্ত কামনাশূন্য হইয়া
কৰ্ম করিবার জন্ত শ্রীভগবদগীতায় শ্রীমদ্ভাগবত সম্বন্ধে উপদেশ করিতেছেন।
তাহা হইলে “অজ্ঞব্যক্তিকে কৰ্ম করিতে উপদেশ করিবে না”—এই প্রকারে
শ্রীমদ্ভাগবতে উক্ত ভগবান্ শ্রীঅজিতদেবের বাক্যের সামঞ্জস্য কিরূপে
রক্ষা পাইতে পারে? কারণ শাস্ত্রে উক্ত আছে—“সম্ভবতোকবাক্যে
বাক্যভেদকল্পনং গৌরবম্”। সেইজন্তই শ্রীপাদ জীবগোস্বামীচরণ বিরোধ-
পরিহারের জন্ত সিদ্ধান্ত করিলেন—যিনি বিজ্ঞ, তিনি অজ্ঞ ব্যক্তিকে অর্থাৎ
শ্রদ্ধাহীনজনকে কখনও কৰ্মত্যাগের জন্ত উপদেশ করিতে পারেন না।
যেহেতু তিনি কোন্জন কৰ্মত্যাগে অধিকারী ও কোন্জন কৰ্মত্যাগে
অনধিকারী, তাহা বিশেষরূপে বুঝিতে পারেন বলিয়াই বিজ্ঞ। অতএব
তিনি কখনই অনধিকারী ব্যক্তিকে কৰ্মত্যাগের উপদেশ করেন না।
তাহা হইলে শ্লোকে যে অজ্ঞ শব্দ উল্লেখ করা হইয়াছে, তাহার
উদ্দেশ্য ঐ ব্যক্তি যতপি তৎকালে ভক্তি-মাহাত্ম্য বিষয়ে অনভিজ্ঞ,
তথাপি জন্মান্তরীর ভক্তি-সংস্কার আছে, বিজ্ঞব্যক্তির সেইটি অনুমান
করিয়াই কৰ্মত্যাগের জন্ত উপদেশ করিয়া থাকেন—এইরূপ সিদ্ধান্তে
শ্রীগীতা ও শ্রীমদ্ভাগবতের বাক্যের সামঞ্জস্য রক্ষা হইতে পারে। তাহা না
হইলে অশ্রদ্ধাধীন জনকে অনন্যভক্তি-অনুষ্ঠানের জন্য উপদেশকারীরই
দোষ ঘটে। যেহেতু অশ্রদ্ধাধীন বিমুখ ও অশ্রবণকারীকে যে ভক্তির কথা
উপদেশ করা হইয়াছে, সেটি বক্ষ্যমান প্রমাণানুসারে অপরাধজনক বলিয়া
শোনা যায়। অনন্তর প্রকৃত বিষয়ের অনুকরণ করা যাইতেছে। অতএব
এই প্রকারে কৰ্ম, জ্ঞান ও ভক্তিরূপ তিনটি সাধনের কথা এবং সেই তিন
সাধনের মধ্যে কোন্জন কোন্ সাধনে অধিকারী, তাহার হেতুও উল্লেখ করিয়া
কর্মেরও যেমনভাবে ভগবৎ-সানুখ্যরূপত্ব হইতে পারে, শ্রীভগবান্ যেমনভাবে
বলিয়াছেন, তাহা উল্লেখ করা যাইতেছে। অর্থাৎ যেমনভাবে অনুষ্ঠান
করিলে কর্মেরও ভগবৎসানুখ্যের দ্বারত্ব প্রকাশ পায়, ১১।২০ অধ্যায়ে
শ্রীভগবান্ শ্রীল উদ্ধবমহাশয়কে সেইরূপই উপদেশ করিয়াছেন। “হে
উদ্ধব! স্বধয়ে অর্থাৎ নিজ নিজ বর্ণ ও আশ্রমোচিত ধর্ম রক্ষা করিয়া
নিষ্কামভাবে যজ্ঞের দ্বারা যজ্ঞেশ্বর আমাকে আরাধনা করিলে স্বর্গ এবং
নরকে যাইবে না—যদি নিষিদ্ধ আচরণ ও শাস্ত্রবিহিত ধর্মের অতিক্রম না
করে। বর্তমান দেহে থাকিয়া নিষ্পাপভাবে স্বধর্ম অনুষ্ঠান করিতে করিতে